



**Inatsisartunut ilaasortaq Laura Táunâjik  
Inatsisartut Allattoqarfiat  
/Maani**

**Tunup immikkut kommuningornissaanut Naalakkersuisut itigartitsinerannut  
tunngavilersuutaasoq pillugu § 37 naapertorlugu apeqqutip nr. 028-p  
akineqarnera**

11-02-2016  
Sagsnr. 2016 - 2492  
Dok. nr. 2090730

Asasara Laura Táunâjik,

Inatsisartut suleriaasianni § 37, imm. 1 naapetorlugu Tunup immikkut kommuningornissaanut Naalakkersuisut itigartitsisimanerannut tunngavilersuutigineqartoq pillugu Naalakkersuisunut apeqquteqarsimavutit. Apeqqutigineqartut uannut akisassanngortinneqarsimapput. Apeqqutigineqartunut akissutigisakka apeqqutigineqartut tulleriiaarnerat malillugu ataani takuneqarsinnaapput.

Postboks 1015  
3900 Nuuk  
Tlf. (+299) 34 50 00  
Fax (+299) 34 50 02  
E-mail: govsec@nanoq.gl  
www.naalakkersuisut.gl

**1. Sermersuup kommunianit tunup immikkut  
kommuningornissaanut Naalakkersuisut itigartitsinerat sumik  
tunngaveqarpa?**

**Akissut:**

Tasiilami innuttaasoq, Egon Poulsen 20.maj 2015 Tasiilami innuttaasunik atsiortitsinerup inerneru Naalakkersuisunut nassiuppai, piumasaralugu minnerpaamik tusarniaanikkut imaluunniit taasititsisoqarnikkut Tunu Kommuneqarfik Sermersuumiit avissaartineqarluni nammeneq kommuningussanersoq aalajangerneqartariaqartoq. Egon Poulsen saaffiginnissummini erseqqissaavoq, atsiortitsineq taamaallaat Tasiilap illoqarfiani ingerlanneqarsimasoq.

24.juni 2015 Naalakkersuisut Egon Poulsenip saaffiginnissutaa Kommuneqarfik Sermersuumut ingerlateqqippaat oqaaseqarnissaannik piumaffigalugit. 9.juli 2015 kommuni imaattumik akissuteqarpoq.

“Kommunip aaqqissuussaanaera pillugu allannguisoqassappat Inatsisartut aalajangigassaraat taamaattumik suliap ingerlanneqarnera Naalakkersuisunut suliassanngorlugu ingerlateqqippara.

Kommuneqarfik Sermersuulli tungaaniit marlussunnik erseqqissaassuteqassaagut:

- Isumaqqanngilagut Tunumi tusarniaanissaq taasititsinissarlunnit inissaminiittoq. Apeqqummi pineqartumi Kommuneqarfik Sermersuumut tamarmiusumut attuumassuteqarpoq, taamaattumillu Kommuneqarfik Sermersuumi innuttaasut tamarmik tusarniarneqartariaqarput.
- Innuttaasunik taasititsinnginnermi Naalakkersuisut kommunit aaqqissuussaanaerat pillugu nutaamik siunnersuusiortariaqarput kingunerisinnaasai tamaasa naatsorsorlugit. Innuttaasut suna isummerfigissanerlugu paaseqqaartussaavaat.”

Borgmesterip oqaaseqaatai naleqquttutut isigaakka.

Tamatuma kingorna kommunip avinneqarsinnaaneranut tunngasut Naalakkersuinikkut Ataqaatigiissaarisartoqatigiinni 12.oktober 2015 sammineqarput, Naalakkersuinikkut Ataqaatigiissaarisartoqatigiit makkuninnga inuttaqartinneqarpoq Naalakkersuisunit, borgmesterinit sisamaasunit aamma KANUKOKA-p siulittaasuanit. Ataatsimiinnermi aalajangerneqarpoq, Kommuneqarfik Sermersuup avinneqarneqarneratigut Tunup nammineq kommuninngornissaanut massakkuugallattoq iliuuseqarnissaq piffissaanngitsoq.

Aalajangernermi tunngavigineqarpoq Siunnersorteqarfik Deloitte-kkut nalunaarusiaanni "Kalaallit Nunaanni Namminersorlutik Oqartussanut Allakkiaq - Kommuneqarfik Sermersuumik avitsinissaq"-mik taaguuteqartumi suliaanni, taannalu august 2015-imi suliakkiisunut tunniunneqarpoq. Nalunaarusiaq oktober 2015-mi Inatsisartunut ilaasortanut ilisimatitsissutitut nassiunneqarpoq.

Kommuneqarfik Sermersooq avinneqarniarpat ilaatigut aningaasatigut makkuninnga sunniuteqarsinnaasoq nalunaarusiami takuneqarsinnaavoq:

- Allaffissorneq ukiumut 20 aamma 25 mio. kr.-t akornanni minnerpaamik aningaasartuutaanerulissaaq. Tassunga ilaavoq massakut kommunalbestyrelsimi ilaasortat 19-iniit 15-inut ikilisinneqarnissaat kiisalu kommuninngortussami kommunalbestyrelsinut, aqutsisoqarfimmut aamma allattoqarfimmut nutaanut ingerlatsineranut aningaasartuutaasussat.
- Kommunip avinneqarneranut atatillugu ataasiaannartumik aningaasartuutit minnerpaamik 15 aamma 20 mio. koruunit akornanni amerlassuseqassapput. Taakkununga ikaarsaarnermut ataatsimiititaliamut, piffissami ikaarsaarfiusumi qullersaqarfimmut allattoqarfimmullu nutaamut sulisussarsiornermut akissarsiaqartitsinermullu aningaasartuutit kiisalu IT-mik allannortiterineranut, ilusimik/ilisarnaammik, nittartakkamik il.il. nutaamik ineriartortitsineranut aningaasartuutit.

Takuneqarsinnaavortaaq Kommuneqarfik Sermersooq ulluni makkunani Tasiilami ltoqqortoormiunilu suliassanik naammassinninniarnermi sulisussanik pisariaqartinneqartunik sulisoqarniarnermik ajornartorsiuteqartarpoq. Kommune isumaqarpoq taamatut ajornartorsiuteqarneq kommunimik avitsisoqarneratigut sakkortuseriaannartussaasoq.

Kommunimi piginnaasatigut amigaateqarneq pisortat sullissiniarnerannut sunniuteqartussaavoq, taakkunungalu ilaasussaavoq innuttaasut inatsisitigut illersorniarneqarnerat.

Namminersorlutillu Oqartussat kommuninut suliassanik nuussiniartarnerat aamma killeqarnerulissaaq, tassami kommunip mikinerpaap pisinnaassusia allatut ajornartumik apequtaalersussaammat pisussaaffiit akisussaaffillu suut kommuninut peqqussutigineqarsinnaalernerannut. Taamaattumik kommunimik avitsinissaq kommunimut ataasiinnaanngitsumut, nunarpulli tamakkerlugu sunniuteqartussaavoq.

Aammattaaq professor Ulrik Kjær Syddansk Universitetimeersoq maj 2015-imi nalunaarusiamik "Kommunalt demokrati i Grønland"-imik taaneqartumik saqqummersitsivoq. Tassani takuneqarsinnaavoq 2014-imi misissuinerit tunngavigalugit amerlanertigut illoqarfinni mikinerusuni innuttaasut kommunerujussuannortitsinerup kingornagut, najukkani tamat oqartussaaqataanerat annikillisutut misigisaraat. Kisianni

Kommuneqarfik Sermersooq 2015-imi Ittoqqortoormiini, Tasiilami aamma Paamiuni najukkani ataatsimiititalianik pilersitsisimavoq. Qanoq najukkani ataatsimiititaliat pingaaruteqartiginersut misissorneqassaaq, misilittakkalli ajunngitsumik kinguneqassappata aqqissuussineq inerisarneqarsinnaassaaq.

Naalackersuinikkut Ataqtigiissaarisartoqatigiit aalajangererat, nalunaarussianilu inernerit tunngavigalugit Naalackersuisut, Tasiilami innuttaasut ilaasa, Kommuneqarfiup Sermersuup avinneqarneqarneratigut Tunup nammineq kommuninngornissaanik kissaateqarnerat, massakkuugallartoq iliuseqarfiginissaa piffissaasorinngilaat.

Aalajangerneq tamanna Naalackersuisut Siulittaasuata Naalackersuisoqarfianit allakkatigut Egon Poulsen-imut decembarip 29-ani 2015 nalunaarutigineqarpoq.

## **2. Inatsisartut upernaakkut ataatsimiinneranni Kommuuninik iluarsaaqqinneq pillugu Naalackersuisut saqqummiussiniarpat?**

### **Akissut:**

Kommunit aqqissuussaanageratigut allanngortitsisoqarniarpat tamanna innuttaasunik kommuninilu aallartitanik qanimut suleqateqarnikkut pissasoq Naalackersuisut kissaatigaat. Tamannalumi pingaaruteqarpoq ataatsimoorluta pitsaasumik angusaqarniassagutta. Taamatut periuseqarniarneq pisortat ataatsimiititsinerannik misissueqqissaartoqarnissaanillu pisariaqartitsivoq. Taamaammat Inatsisartut upernaakkut ataatsimiinnissaanni kommuninik aqqissuusseqqinnermut tunngatillugu saqqummiisoqarsinnaanissaa Naalackersuisut suli isummerfiginngilaat.

Inussiarnersumik inuulluarit



Kim Kielsen



27. januar 2016

Inatsisartut suleriaasiat § 37 immikkoortoq 1 naapertorlugu matumuuna Naalackersuisunut apeqqutit imaattut saqqummiuppakka:

1. **Sermersuup kommuunianit tunup immikkut kommuuningornissaanut Naalackersuisut itigartitsisinerat sumik tungaveqarpa?**
2. **Inatsisartut upernaakkut ataatsimiineranni Kommuuninik iluarsaaqqinneq pillugu Naalackersuisut saqqummiussiniarpat?**

(Inatsisartuni ilaasortaqlaura Táunâjik, Siumut)

**Tunnqavilersuut:**

Naluneqangilaq tunup immikkut kommuuningornissaanik innuttaasut kissaateqartut atsiorderi Naalackersuisunut apuuneqarsimalermata. Innuttaasut kissaataat taamatullu Naalackersuisooqatigiinnermi isumaqatigiisut naapertorlugu nalilersuinissaq suli pinngitsoq, sooq itigartitsisoqareerpa? Aamma kommuuninik iluarsaaqqinnerup 2015-ip upernaavaniilli nalilersorneqarnera inaarutaasumik suliarineqartussanngorlugu qaqugu inatsisartunut saqqummiunneqarniarpa? Ilimagineqarsinnaava upernaakkut 2016-imi inatsisartut ataatsimiineranni tamanna pissasoq?

Apeqquteqaatimma ullut suliffiusut qulit iluanni akineqareersimanissaat kissaatigaara.